

Sp.

719. Breytingartillögur

við frv. til laga um sildarmat.

Frá sjávarútvegsnefnd Ed.

1. Við 1. gr. Greinin orðist þannig:

Skoðun og mat skal fara fram á allri nýveiddri sild, sem ætluð er til útflutnings, hversu sem hún er veidd, ef hún er söltuð, sykursöltuð eða kryddsöltuð hér á landi eða hér við land.

Skodun þessa og mat framkvæma lögskipaðir matsmenn undir umsjón yfirmatsmanna, og skal söltun sildarinnar fara fram undir eftirliti þeirra.

Öll síld, sem söltuð er til útflutnings í lagarheldar tunnur, skal vera undir eftirliti matsmanna frá því hún kemur að landi og til þess er hún er flutt út, nema hún sé bituð smátt eða meðfarin á sérstaka iðnaðarvísu, alveg frábrugðna venjulegri söltun.

2. Við 2. gr. Greinin orðist þannig:

Yfirmatsmenn skulu vera fjórir, skipaðir af atvinnumálaráðherra. Hefir einn þeirra aðsetur á Akureyri og hefir til yfirsóknar svæðið milli Ólafsfjarðarmúla og Langaness. Annar hefir aðsetur á Siglufirði og hefir til yfirsóknar svæðið milli Ólafsfjarðarmúla og Hornbjargs. Þriðji hefir aðsetur á Ísafirði og hefir til yfirsóknar svæðið milli Hornbjargs og Dyrhólaeyjar. Fjórði hefir aðsetur á Austfjörðum og hefir til yfirsóknar svæðið milli Langaness og Dyrhólaeyjar. Atvinnumálaráðuneytið setur þeim erindisbréf.

Yfirmatsmenn hafa að launum hver 2000 kr. á ári. Auk þess skal þeim greiddur ferðakostnaður og fæðispeningar, ef þeir þurfa að takast ferð á hendur vegna starfa síns, eftir reikningi, sem atvinnumálaráðuneytið úrskurðar.

Laun þeirra, ferðakostnaður og fæðispeningar greiðist úr rikissjóði. Þeir fá einnig greiddan úr rikissjóði nauðsynlegan símakostnað vegna sildarmatsstarfa.

Undirmatsmenn skipar lögreglustjóri eftir tillögum yfirmatsmanna, og svo marga sem þörf þykir. Atvinnumálaráðuneytið setur þeim erindisbréf, en yfirmatsmenn ákveða starfssvið þeirra, og skulu þeir hlýða fyrirskipunum yfirmatsmanna í hvívetna. Kaup undirmatsmanna ákveða yfirmatsmenn, og greiðir það sildareigandi, en sá, er sildina verkar, ber ábyrgð á greiðslunni.

Allir matsmenn skulu rita undir eiðstaf um, að þeir vilji hlýða ákvæðum þeim, sem sett eru um starf þeirra, og rækja stöðu sína með alúð og kostgæfni.

3. Við 3. gr.

a. Á undan gr. komi ný grein, svo hljóðandi:

Áður en sildveiðaskip fer á veiðar skal skipstjóri afla sér eyðublaða undir skýrslur um veiði sína. Ráðuneytið gefur út eyðublöð þessi, og skulu yfirmatsmenn sjá um, að hvert sildveiðaskip geti fengið hæfilega mörg. Ber skipstjóra að fylla út eyðublöðin og tilgreina á þeim mánaðardag og klukkustund, þegar byrjað er að innbyrða veiðina og hve mikil hún er í hvert skipti. Skýrslur þessar skulu síðan afhentar matsmanni sildarinnar, áður en byrjað er að salta hana. Vanræki skipstjóri að útfylla skýrslur þessar, má ekki salta sildina til útflutnings í lagarheldar tunnur.

Nú gefur skipstjóri ranga skýrslu um, hve gömul sildin er þegar

hann kemur með hana til söltunar, og varðar það sektum samkvæmt 11. gr.

b. Greinin orðist þannig:

Nú kemur sildveiðaskip að landi með nýja sild, sem ætluð er til söltunar og útflutnings, og skal flytja hana þangað, sem matsmaður er fyrir, og ber skipstjóra þegar að tilkynna honum komu sína, og má eigi byrja á söltun sildarinnar fyrr en matsmaður hefir skoðað hana.

Alla sild, sem söltuð er til útflutnings, skal flokka. Flokkunina skal framkvæma samkvæmt reglugerð, er atvinnumálaráðuneytið setur þar um. Skal í reglugerðinni svo vera fyrir mælt, að sérhverjum, sem salta vill sild, skuli gert að skyldu að flokka nákvæmlega eftir stærð og gæðum að minnsta kosti 15% af allri þeirri sild, er hann lætur salta til útflutnings af framleiðslu ársins 1932, og er atvinnumálaráðuneytinu heimilt að fyrirskipa aukningu á slíkri stærðar- og gæðaaðgreiningu árlega næstu þrjú ár um allt að 15% hvert ár.

Meðan á söltun stendur ber matsmanni að gæta þess vandlega, að það af sildinni, sem flokka skal nákvæmlega eftir stærð og gæðum, blandist ekki saman við það, sem flokkað er aðeins eftir gæðum. Nú gætir einhver, sem að verkun vinnur, ekki fyrirskipana matsmanna, eða sýnir óvandvirkni í starfi sínu, og getur matsmaður þá krafizt þess, að honum sé vikið frá starfinu um tiltekinn tíma.

Atvinnumálaráðuneytið getur ákveðið, hvaða salttegundir megi nota í sild til útflutnings og hversu mikið það skuli vera í hverja tunnu í minnsta lagi.

4. Við 4. gr. Greinin orðist þannig:

Undir matsskylda sild má einungis nota hreinar og ógallaðar tunnur, enda séu þær úr góðu efni og vel smíðaðar. Getur matsmaður bannað að láta salta í þær tunnur, sem hann telur til þess óhæfar.

Að söltun lokinni skulu tunnurnar geymdar á góðum, þurrum stað, og á svo góðum undirlögum, að þær liggi hvergi við jörð eða í bleytu.

Gamlar eða notaðar sildartunnur má ekki flytja til landsins til notkunar undir sild til útflutnings nema með samþykki atvinnumálaráðherra, að fengnum tillögum yfirsildarmatsmanns.

5. Við 5. gr. Greinin orðist þannig:

Nú hefir sildarmatsmaður grun um, að sild hafi skemmt eftir söltun, af sólarhita eða öðrum ástæðum, eða að í henni sé mikil áta, og skal hann þá tilkynna það yfirmatsmanni, sem lætur nákvæma skoðun fara fram á hinni grunsömu sild.

6. Við 6. gr. Greinin orðist þannig:

Nú vill eigandi eða umráðamaður sildar senda hana til útlanda, og skal hann þá tilkynna það yfirmatsmanni svo tímanlega, að hann geti látið fara fram frekari skoðnn á sildinni áður en hún er flutt í skip, ef hann telur þess þörf, og skal slík skoðun jafnan fara fram á allri sendingunni, ef sildin hefir ekki verið flutt út innan þriggja vikna frá því hún var söltuð.

7. Við 7. gr.

a. Greinin orðist þannig:

Allri sild, sem send er héðan á erlendan markað, skal fylgja matsvottorð yfirsildarmatsmanns, eða þess matsmanns, sem hann kann að veita umhöð til að gefa út slíkt vottorð, ef hann, einhverra orsaka vegna, getur ekki verið viðstaddur, þegar vottorð þarf að gefa. Matsvottorð þetta skal rita á farmskírteini þau, er fylgja hverri sildarsendingu. Í vottorðinu skal það tekið fram, að ferming skipsins hafi farið fram undir eftirliti matsmanns, enda getur hann stöðvað ferminguna, ef ekki er í hvívetna farið eftir fyrirskipunum hans um umbúnað og frágang sildarinnar í skipinu. Atvinnumálaráðuneytið gefur út fyrirmynd að farmskírteini með árituðu matsvottorði.

Lögreglustjórar eða umhöðsmenn þeirra skulu hver í sínu umdæmi sjá um það, að sildarfarmskírteini séu rituð á fyrirskipuð eyðublöð, og fylgi matsvottorð hverri sildarsendingu, sem þeir afgreiða, enda votti þeir undirskrift hlutaðeigandi matsmanns á farmskírteinið.

b. Á eftir greininni komi ný grein, svo hljóðandi:

Alla matsskylda sild, sem út er flutt, skal merkja með lögskipuðu merki, sem nánar verður ákveðið af atvinnumálaráðuneytinu. Skal það málað á efri botn hvernar tunnu. Ennfremur skal setja í þar til ætlaða reiti söltunardag, merki, er tilgreini veiðiaðferð, gæðamerki og flokkunarmerki sildar eftir stærð, shr. 4. gr. Ennfremur neðan undir merkjunum einkennisstafi þess, er sildina verkar, og útflytjanda hennar.

Greinatala frv. breytist samkvæmt atkvæðagreiðslu.